



## КАДРИЯТЛАР КАЙДА ҚОЛДИ?

Меҳмон отангдан улуг, деган мақолни ким эшитмаган, дейсиз. Умуман доно халқимиз бисотида меҳмонни улуглаш борасида кўп ҳикматли гаплар борки, буларнинг бари ўзбек халқининг ўзлигидан келиб чиққан.

Бу ҳақда гап кетса, хотиралар мени олис болалик йилларимга етаклайди. Қишлоқда бирор киши тўй қилса, ўша кунга бутун қишлоқ аҳли тайёргарлик кўрарди, десам лоф бўлмайди. Тўйга ташриф буюрган меҳмонларни ҳар ким имкониятига қараб уйига таклиф қилар, тўй эгаси берган егуликларга қаноат қилмай, ўзи ҳам топта тутганини уларнинг олдига қўяр эди. Ҳатто меҳмонлар миниб келган отлар ҳам қаровсиз қолмасди. Қуш уясида кўрганни қилади, деганларидек, биз болалар таом тортилишидан олдин ёки таомдан кейин уларнинг қўлига сув қуяр, ҳатто эрталаб таҳоратлари учун иссиқ сув тайёрлаб берар эдик.

Ҳозирги болалар-чи? Ана шу саволни баъзан ўзимга ўзим бераман, лекин жавоб тополмай юрагим муз бўлади.

Утган йили Гулгунпўшт қишлоғида яшовчи Нурмат Абдиев тўй қилди. Табиийки, катта маъракага узоқ-яқиндан қариндош-уруғлар, ошина-оғайиллар таклиф этилди. Ҳаммаси жойида бўлаётган эди, лекин...

Шу қишлоқда яшовчи 1974 йилда туғилган Паҳ-

лавон Жумаев, Абдулла Гафоров ва Увайсий номли мактабнинг тўққизинчи синф ўқувчиси Толиб Абдуллаевлар қилмиши туфайли совуқчилик тушди. Улар Такия қишлоғидан келган Собир Йўлдошевнинг «ВАЗ-2106» белгили машинаси бағажини очиб, ундаги эҳтиёт учун олиб юрилган баллон, ён тарафдан кўрсатувчи ойна ва антеннани ўғирлашди.

Бу нарсалар уларнинг кўзига оз кўринди, шекилли, яна бир меҳмон — Абдуаҳад Мейликовни қақшатишди. Унинг «ВАЗ-2101» белгили автомашинасидан «Электроника» магнитофони ва тўрт дона кассетани ҳам ўғирлаб, Абдулла Гафоров деган кишининг ҳовлисига яшириб қўйишди.

Эгриқўлликни одат қилиб олган Паҳлавон Жумаев бундай ишларни кейин ҳам давом эттираверди. Бир куни Салим Мавлоновнинг тўйига «Минск» белгили мотоцикл миниб келган Абдурасул Мирзаевни пиёда қолдирди. Ўғирланган мотоциклни шу қишлоқлик Раҳмон Умаровга 200 сўмга пуллаб юборди.

Яқинда туман халқ суди Паҳлавон ва унинг шерикларига қилмишларига яраша жазо берди.

Лекин бағримни ҳамон жавобсиз савол эзадди. Отабобларимиздан мерос бўлиб қолган кадриятларимиз нега унутуляпти?!

Майсара ҲАЙДАРОВА,  
Китоб тумани.



## МИЛТИҚ—

### ҚОТИЛЛИК ҚУРОЛИ

Шу йилнинг 22 мартда Ленин йўли жамоа хўжалиги ҳудудида 1965 йилда туғилган Роберт Кимнинг жасади топилди. Текшириш уни қуролдан отиб ўлдирилганлигини аниқлади. Тузилган оператив-қидирув гуруҳи ходимлари анча тер тукишигандан сўнг қотилларнинг изига тушдилар. Улар 1961 йилда туғилган, илгари икки бор судланган, шу ҳудудда яшовчи А. Ли ва ҳеч қерда ишламайдиган Д. Кимлар экан.

Қотилликни очиш юзасидан ўтказилган тадбир натижасида фуқаро Роберт Перикнинг уйи текширилганда, «ТОЗ-8» белгили кичик калибрли милтиқ, 7 дона ўқ ва наша топилди.

Б. ХОЛМИРЗАЕВ.

СУРАТДА: милиция катта лейтенантлари М. Жанталиев, С. Алиевлар ашёвий далилларни кўздан кечирмоқдалар.

Суратни  
Боқижон ХОЛМИРЗАЕВ  
олган.

## ТҮН ЙИРТАРЛАР

Бугун виждони, номуси бор, орияти бор кишилар халқини кийинтириш, тўйдириш йўлини излаяпти. Афсуски, баъзилар имон, юрт туйғусини ҳам тарозига тортиб юборадиганлар тоифасидан ҳисобланишади. Буни милиция ходимлари томонидан жумҳурият ҳудудидан четга олиб чиқиб кетилаётган моллар аниқланаётгани яққол кўрсатиб турибди.

Ўшлик В. Заичкин «ВАЗ-2102» белгили автомашинасида Андижон шаҳридан 117 килограмм

макарон ва 55 дона Япония чойнагини олиб кетаётганида тўхтатилди. Тошкент шаҳрида текширилган иккита ҳарбий юк машинаси кузовидан эса 100 дона унитаз ва 103 минг сўмлик автомобилнинг эҳтиёт қисмлари топилди.

Қашқадарё вилоятининг Баҳористон туманида «Иқбол» ширкатига қарашли «МАЗ-500» белгили 35-47 ХЗЛ рақамли автомашинани кўздан кечирилди. Кўринишидан қўй оғзидан чўп олмайдиган ҳайдовчи Б. Ма-

шарипов халқимиз risksини қийиб, 10 тонна гуруч билан бошқа жумҳурият фуқароларини хурсанд қилиш ниятида йўлга чиққан экан.

Камбағални урма, сўкма, тўнини йирт, деган эканлар. Бошқа жумҳуриятларга қараганда иқтисодий аҳволи оғир ҳисобланган ўлкамиздан четга товар олиб чиқиб кетишга уринаётганлар бунни тушунишармикан?! Молларни улгуржи пуллаётган савдо аҳли-чи? Ёки улар бошқа жойда яшашадими?

Ғ. БОЛТАБОВ.

## СССР Олий Кенгашининг қарори

### Беҳаё асарларни, зўравонлик ва шафқатсизликни тарғиб қилишнинг пайини қирқишга доир кечиктириб бўлмайдиган чора-тадбирлар тўғрисида

СССР Олий Кенгаши ҳар бир инсоннинг ижод эркинлиги, маданий ва маънавий эҳтиёжларини қондириш ажралмас ҳуқуқини тан олиб, беҳаёликни, зўравонлик ва шафқатсизликни тарғиб қилувчи кино, видео, матбаа нашрлари ва бошқа маҳсулотлар тарқалганлиги, бир қанча телевизион кўрсатувлар, спектакллар, бўш вақтни ўтказиш марказлари программаларида одамларнинг кадр-қимматини, халқларнинг миллий ва диний туйғуларини таҳқирловчи, болалар ва ёшлар орасида ҳуқуқбузарликни содир этишга, руҳий хасталикка кўмаклашувчи сахналарнинг кўрсатилиши муносабати билан ташвиш изҳор қилади ва қарор қилади:

1. СССР Вазирлар Маҳкамасига қуйидагилар топширилсин:

Бир ой муддат ичида

спектаклларга, концерт-томоша программаларига, телевизион кўрсатувларга, босма нашрларга, кино, аудиовизуал ва бошқа маҳсулотларга баҳо бериш ва уларда беҳаёлик, зўравонлик ва шафқатсизлик белгилари бор ёки йўқлигини аниқлаш учун давлат эксперти комиссиясини тузиш ва унинг таркибига юқори малакали мутахассисларни киритиш;

Кино, видеофильмлар ва видеопрограммалар регистри ташкил этиш, унинг зиммасига асарларга баҳо бериш ва рухсат этувчи гувоҳнома (сертификат) топшириш вазифасини юклаш;

Икки ой муддат ичида кино, аудиовизуал асарларни очиқ намойиш этиш тўғрисидаги низомни ишлаб чиқиш ва тасдиқлаш, бунда бундай асарларни кўрсатиш ва прокатга бериш, чет эллардан сотиб олиш ва чет

элга сотиш шартлари, видео-томоша корхоналари очиш ва уларни рўйхатга олиш, мазкур маҳсулотларни прокатга чиқариш учун рухсатнома (сертификат) олиш, видеотомоша корхоналарига (ташкilotларига) кириш учун ёшни чеклаб қўйиш тартиби ва бошқа масалалар кўзда тутилиши керак;

Ички ишлар идораларида ижтимоий ахлоқ соҳасида ҳуқуқбузарликнинг олдини олиш ва чек қўйиш махсус хизматини ташкил этиш; беҳаё мазмундаги маҳсулотлар, зўравонлик ва шафқатсизликни тарғиб қилувчи асарлар давлат чегараси орқали ўтишининг олдини олиш юзасидан қўшимча чоралар кўриш.

2. Белгилаб қўйилсинки, корхоналар, ташкilotлар ва фуқаролар эротика мазмундаги маҳсулотларни халқ депутатлари маҳаллий Со-

ветларининг ижро этувчи идоралари томонидан махсус ажратилган жойлардаги-на сотишлари, тарқатишлари ёки реклама қилишлари мумкин.

3. Республикаларнинг олий кенгашларига:

Кино, видеофильмлар ва видеопрограммалар республика эксперти комиссиялари ва регистрларини таъсис этиш;

Эротик мазмундаги асарларни тайёрлаш, кўпайтириш, реклама қилиш ва сотишга балоратга етмаганларни жалб қилиш имкониятини истисно қиладиган ёшни чеклашни белгилаш;

Эротик мазмундаги материалларни сотиш, тарқатиш ва реклама қилиш қондаларини белгилаш;

Кино, аудиовизуал асарларни очиқ намойиш қилиш тўғрисидаги қондаларни бузганлик учун маъмурий жа-

вобгарликни белгилаш тавсия қилинсин.

4. СССР Олий Судига беҳаёликни тарғиб қилувчи буюмларни, шунингдек зўравонлик ва шафқатсизликни тарғиб қилувчи асарларни тайёрлаш, тарқатиш ва реклама қилиш ҳамда сотиш учун жавобгарликни кўзда тутувчи қонунларни қўлланиш тажрибасини ўрганиб судларга тегишли изоҳномалар бериш таклиф қилинсин.

5. СССР Вазирлар Маҳкамасига ушбу қарорнинг биринчи банди қандай бажарилаётганлиги ҳақида 1991 йил 1 ноябрча СССР Олий Кенгашига ахборот бериш топширилсин.

6. СССР Олий Кенгашининг Маданият комитети ва СССР Олий Кенгашининг Қонунчилик ва ҳуқуқ-тартибот комитети ушбу қарорнинг бажарилишини назорат этишни таъминласин ҳамда у қандай бажарилаётганлиги ҳақида 1991 йилнинг охирида СССР Олий Кенгашига ахборот берсин.

СССР Олий Кенгашининг  
Раиси

А. ЛУКЪЯНОВ.

1991 йил 12 апрель.  
Москва, Кремль.





